

摘藻堂四庫全書薈要

集部

欽定四庫全書薈要

集部

御選明詩卷九十七

詳校官原任主事臣李斯咏



欽定四庫全書薈要卷一萬八千五百九十七

集部

御選明詩卷九十七

五言絕句二

程敏政

題碧桃便面

省識春風面何因出鏡中  
暗香吹不斷掌上舞迴風  
荏平道中

落日荏平道孤村未掩關  
望中青隱隱人說是陶山

題汪翼貢士四禽圖

春風海上桃仙禽託棲止莫啄千葉花留結千年子  
何處青絲禽飛來一枝託回首啄山茶霏霏霜華落  
有鳥名翠碧無花豔海棠依依留不去顏色兩相當  
娟娟蠟啄鳥挺挺當風立斜壓一枝低寒梅凍無力

山水小畫二首為張尚相題

山色青於染松陰掃未開水邊芳草地才見兩人來  
危坐秋林下翛然古意生山風吹耳淨幽絕澗泉聲

海子

十里城陰道西湖一派分秋晴沙岸尾時見白鷗羣

莊泉

題畫

遙山青兩峯老樹紅一葉我懷不可羈月明江獨涉

送博羅何孝子

白酒江門暖北來風正寒釀方君不錄明日寄書難

張弼

崇溪景

悠悠下村路望望皆烟樹何處讀書聲山禽忽飛去  
登登度西岡恰與詩人會歸鳥下幽叢斜陽在岡背  
白鷺宿寒塘寒塘浸明月懊惱少年心分明鏡中雪  
橫岡春草深牧牛牛易飽短笛兩三聲歸來山月皎

李傑

題扇

竹徑清陰合行行路欲迷仙家何處是只在石橋西

雜興

花霧曉濛濛落紅飛不起  
文采雙鴛鴦蕩漾綠池水

賀欽

題扇上釣魚圖

倚杖看閒山垂綸釣淩水  
山頭宿霧開水面清風起

楊一清

山水畫

雲淨月華明江山各自清  
道人垂首坐莫是聽松聲

雜作題畫

幽泉出谷鳴疎竹和雲長微吟坐開襟梧桐月初上

馬中錫

絕句二首

春草碧連天春鶯始妬柳行人歸未能且醉長安酒  
寄語長亭柳東風莫漫吹黃金臺下客猶未有歸期

秋江獨釣便面寄陳元溥

舴艋小于杯鱸魚肥似瓠故人如可來沽酒蘆花渡



吳愈

秋水泛舟

雨餘沙磧明風起波紋亂何處棹歌聲孤舟倚頽岸

彭綱

宿鄧川驛

風走落葉聲山犬吠不已披衣夜出戶明月照溪水

姚安分司

吟人夜未眠迢迢漏初永起步山月中疎枝露猿影

林俊

風木為康子肅題

遼鶴斷歸期  
攤書懶柱頰  
山月冷不眠  
雨聲戰寒葉

秋齋為周彥通題

暑伏涼又生  
蟲吟葉已故  
壯日苦不常  
翻書落寒蠹

題畫

獨屋芝草香  
衡門落松子  
輕舟泛芙蓉  
明月在秋水

閨懷

幽絃不成聲  
手生欲誰訴  
平安兩字書  
開落幾花樹  
趙寬

題畫

細雨入林深  
孤雲映山薄  
何處是歸舟  
臨風倚江閣

蔡清

別鄒汝愚謫雷州吏目

識君未三月  
別君遽萬里  
吾豈小丈夫  
淚落不能止

石瑤

秋色

返照入高樓樓中客惆悵開樓看秋色猶在闌干上

夜鐘

山寺數聲鐘霏霏度林薄夜久霜氣嚴林間下棲鶴

砧聲

西嶺無情石東林枯木枝如何明月夜觸手動秋思

蔣冕

湘山寺

孤墦湧山腰鐘聲隔烟樹朝暮見雲飛不見雲歸處

沈周

為友人寫蕉

便欲開船去因君更寫蕉要知相憶處葉上雨瀟瀟

史鑑

冷泉亭口號與劉邦彥別

君去我獨留持盃勸君酒明日虎跑泉還來看山否

倪復

江行

野水田田綠江村曲曲斜獨行羣不厭坐占白鷗沙

雷鯉

題畫

幽人讀書處茅屋倚江開雲抱長流去山銜好日來  
一棹滄江上烟流帶浦沙小橋通細磧別浦入荷花

張鈇

淮陽夜月

今夜淮陽月清光似故鄉  
有人千里外對月望淮陽  
黃雲

風雨

風雨暗江天邊江夜泊船  
寒燈對兒女歸路逼殘年

羅燾

野興

山中雨欲來樹杪風先起  
猶有試茶人偶坐松蘿裡

錢百川

寄中甫上舍

淮清樓頭花白下橋邊酒醉殺少年郎借問君知否

張文承

客至

茅屋兩三間草草蔽風雨客來不入門坐愛千年樹

方太古

江中晚泊

風急水欲立日暮山爭深雙席落洲渚幾家新柳陰



寄意

春風吹柳枝遊子別家時  
壩上多楊柳春風吹不吹  
放船

放船春水漫繫纜柳條青  
去去江村近風吹魚網腥  
程玄輔

懷楊儀部君謙

故人久無書山川隔淮楚  
相思不可攜獨卧江東雨  
過澱湖泊石浦

沙浦偃秋風湖雲蔽夕雨何處遠行人飛帆下石浦

石浦偶占

石浦潮自回湘簾風欲舉一洗草堂清過雲灑疎雨

吳鑛

秋晚

風高野水寒天遠青山小渡口人不來斜陽送歸鳥

朱訥

題畫

空翠明遠林夕陽澹紅樹茅屋傍深溪漁舟日來去  
朱朴

以畫寄雲村

朝望南山雲暮望南山雲雲山朝暮望一望一思君

董兩湖扇圖

南湖春水平北湖春草綠中有蕩舟人解唱滄浪曲

夕

出門望南山日夕山光冷山月出未高棲鴉動林影

曹鑠

山家圖

茅屋青山裏居人不務耕  
雨晴攜短鋤隨處掘黃精

秋郊晚眺

潮落寒江淺沙陂露水痕  
漁人歸曬網撾鼓入遙村

許讚

雪詞

冷餘紅浪破消盡紫沉烟  
正是愁無託楊花忽滿川

初冬

庭院靜如許時聞落葉聲日邊雲氣涵樹影不分明

猿

蓬巢飽山果負子浴前溪啼冷已山月令人雨淚棲

漁父

釣魚柳溪頭賣魚花村口沽酒成獨醉枕蓑卧蓬牖

熊卓

居庸館中

隘地關門擁山樓鼓角傳長風吹不歇塞草自年年

懷友人

昔別柳條綠如今霜葉翻思君獨無語寒日下荒原

送人赴道州任

月照河臺酒離情那可消衡陽飛鳥盡君去更迢迢

出居庸

沙上望行人日暮愁心絕江南四時春邊地五月雪

送客城南

楊柳河橋外春風倒玉壺離情不可道江路滿蘼蕪

汪循

老去

老去心還競春來花又新未應行樂地偏慙少年人

王守仁

山中示諸生

桃源在何許西峰最深處不用問漁人沿溪踏花去

魯鐸

裁衣寄遠

心事停并剪啼痕漬越羅離愁身萬里寬窄定如何

盆梅

老幹纔逾尺膠枝賸著花小盆留宿雨疎影亦橫斜

薔薇下

獨酌薔薇下花陰亂午風有時殘露滴剛著酒盃中

臨桂道中漁者

危灘若奔雷江魚正貪上順水飛漁船斜下攔江網



東溪小景

閒遡東風去溪頭千樹花停舟偶然坐日暮未還家  
清流意不淺君須為渠醉莫遣醒時歸猶解塵中事  
隔溪語農人新禾莖尚短車痕記水畦莫灌東畦滿

鳬洲即事

見說瓜堪摘閒過洲上來小船風打去半日未能回  
散步

細草緣溪軟晴朝步履遲往來深樹裡啼鳥不曾知

俞泰

題扇寄邊華泉

木葉迎風下孤亭傍水開  
何時尋舊約載酒過江來

潘希曾

岸柳

岸柳綠絲絲春風不斷吹  
昨來誰此別留得折殘枝

徐泰

枝江道中

水落枝江道風高歲暮天挂帆烟雨裏惆悵入江船

謝丕

行樂歸

徙倚亭欄外何人共此杯春風知我意吹送小舟回

崔銑

秋風

秋風何蕭蕭夜夜動林莽除畹本種蘭奈此艾蒿長

陸深

初夏

野曠孤亭迴晝長  
花影遲蒹葭飛白鳥  
楊柳轉黃鸝  
芍藥花初謝  
芭蕉葉已斜  
窓前一夜雨  
浮綠漲文紗  
林日不到地  
溪風長滿船  
雨餘黃犢健  
天際白鷗眠  
初日浮空動  
微風剋地涼  
亭衣人尚怯  
看竹過橫塘  
細草緣堦砌  
幽禽語畫梁  
好風排戶入  
吹散午時香

西湖

夜氣消殘暑  
天光浸曉星  
草青藏白鳥  
波綠泛紅菱

途中

曉行不知程夢醒聞細浪曙月逐雞聲擢歌來枕上  
武鄉山中晚行

落日下西崦餘光在高樹水流青山中人行白雲處  
歸途絕句

日落山烟紫林深暝色寒殷勤問前路今夜宿新安  
周廣

遺辰州張尹

江口風逾急孤舟日已西多情山上月相送過辰溪

倪宗正

為顧新山題畫用思道韻

久住山東溪欲往水西去一夜春草生溪路無尋處

嚴嵩

山塘

山塘深且廣邈迤抱山麓隔浦見人家依依桑柘綠

出仰山

鐘聲在山間客子出山去細雨濕春衣新寒入高樹

李夢陽

聞笛

白日挂雲間誰家玉笛閒北風吹楊柳落葉滿關山

曉鶯

曉曉夢中迷流鶯碧樹西起來紅日照已度別枝啼

曉出禁闥

楊柳城南道芙蓉小苑通內使來調馬君王敕射熊

東華門偶述

銀甕爛生光盤龍繡袂香但知從內出不省賜何王

黃州

浩浩長江水黃州那箇邊岸迴山一轉船到堞樓前

江行雜詩

迎送山相似舟移迷北南回看阜口日已照石華潭  
日出青蘋濕江渾路不分昨宵驅雨至知是海南雲

送人



頗訝楓林赤無風葉自鳴  
來人與歸客同聽不同情

開先寺

瀑布半天上飛響落人間  
莫言此潭小搖動匡廬山

寄徐子

東省堂前樹南陽宅裡花  
春風如往日夜月向誰家

寄都主事穆

江草喚愁生思君黃鳥鳴  
遙心將夜月同滿闔閭城

贈客

出郭江南望暮天雲北飛斷蓬寒更轉長路幾人歸

贈王左史

君家百甕酒留連胡不飲花月我自來醉即花間寢

送王生北行

朝散午門西春風起御堤上林花半發幾處早鶯啼

紫霞洞主歌五首

朝霞弄海色閃爍如金蛇回光照巖洞駕我青鸞車  
雲洞窈窕行覓石髓食蕤蕤古苔上有書字不識

丹霞熨朝旭桂葉一何芾中有騎鶴人下上隨雲氣  
朝餐赤城氣暮攬羅浮色常有瑤草花寒至不曾識  
石泉嫋長蘿烟翠滿山室忽聞空中音幽人弄瑤瑟

何景明

雨後十首

水漲孤村白天垂四野青開門秋雨霽閑步郭西亭  
竟夕雨連舍今朝雨出溪輕雷千嶂外斜日數家西  
三日不出門草長門前路登樓一水明倚柱千山暮

人歸郭門樹鳥噪野田風雨散高城上日落山澗中  
畫角城隈起風吹響入雲清秋易生感深夜更多聞  
遙看三角山正在雲生處日暮山中人空攀荔枝樹  
片片白鷗鳥看人隊隊飛沙頭莫相認與爾久忘機  
檻倚崩沙出籬通暗水過家人休埽石自愛碧苔多  
朝聞城西鐘暮望城西寺寺旁二古松長藤垂到地  
塘邊楊柳樹春條秋未摧已送黃鸝去還看白鷺來

題畫二首

渺渺春山雲離離春江樹君看江上山不是人間世  
古洞入青冥山通武陵渡漁郎莫放舟恐失花間路  
長安

白雲望不盡高樓空倚欄中霄鴻鴈過來處是長安  
晚出左掖簡薛君采

露重芙蓉館雲輕翡翠城文園病司馬消渴望金莖  
獨立

獨立對秋陰冥冥望河渚只見沙上烟不見烟中樹

徐禎卿

沅溪潘進士在長安逆旅中見庭下山丹花詰  
其主云是沅中移來感而賦詩命予嗣響

故苑花空發他鄉鶯自啼主人孤館裡斜日楚雲西  
鳳凰山園雜詠

鳳鳴亭

鳳鳥期不來瑤華幾銷歇唯有山中人吹簫弄明月

奕臺

仙人好博奕時下綠雲中一片蒼苔石落花長自紅  
送范靜之遷威州

聞上巴江峽黃牛峽最遲君聽流水意何似隴頭悲  
爾向巫山日瞿塘春可憐柳絲嬌綠水白雪媚陽天  
玉壘為糟蘖巴川即酒泉乘舟捉明月直到女牛邊  
夜泊潯陽

草色潯陽江燈前武昌客獨坐秋風來蒹葭時撼撼  
示鴈

爾向滄江別予方湘水行秋風莫相負遲爾岳陽城

曉下廬山

下山鼯鼠啼藤竹使人迷多謝東林月殷勤過虎溪

香圃

露華散平林月明在寥廓時有天風來冷然桂花落

答獻吉

花發平章宅鶯啼省樹春殷勤花鳥意愁殺獨遊人

邊貢



中元見月

坐愛清光好更深不下樓不因逢閏月今夜是中秋

上陵道中

蒼蒼土門口日出逢樵叟問爾何事來山中苦無酒

送劉約中之金陵

君到石城邊應看石城樹樹杪百尺臺是儂行樂處

贈別甯子

白日就長道清秋淩大河非關燕趙別相送一悲歌

西園

朝看長白山暮看長白山山色有朝暮吾心常自閒  
庭際何所有有萱復有芋自聞秋雨聲不種芭蕉樹

雜詩

月色沙上澹山雲天際浮春江萬里闊獨見一漁舟

題畫

鳥啼青石岡日照紅泥坂杳杳雲外鐘山僧獨歸晚  
近浦寒潮落平沙返照紅不嫌歸路晚家在板橋東

康海

答太微汧東作

此水遠彌潔此汧晴更嘉請君汧上坐看此水中霞  
君家韋杜曲佳處定無比夕陽原上來此汧亦堪喜  
汧東多楊柳枝枝弄新碧不繫郎君車常拂處士席  
木末載酒來君與坐相酌愁彼幽鳥鳴君心樂不樂

題畫

長裾澹容與散步蒼松下不是鹿門人何似棲棲者

岐山道中

雨過萬木茂天開千嶂青  
迎風翻錦蝶拂霧點蜻蜓  
偃蹇栽脩竹巖竇立假山  
綠濤浮柳色蒼翠壓朱闌  
渡渭南望

水際孤雲合船頭細浪生  
青山飛白鷺綠竹轉黃鸝  
客散太微道人歸黑水西  
臨流揮短賦即景試新題  
杏花亭小坐

我愛千畝杏逶迤圍小亭  
浮雲日夕靜疊入萬峰青

柳下觀棋

塌地坐彈棋  
注酒莓苔上  
水際暗香來  
怕是桃花漲

王廷相

綿竹道中

水藤罩黃籜  
岸篠生綠蕤  
不見梅花樹  
香風暗撲衣  
晴春日蒙茸  
遠客自惆悵  
白雲乍散彩  
青山還遮望

牡丹

迎風綠雲翻  
含春錦苞吐  
何處雙彩鸞  
飛來關毛羽

秋雨

山城一夜雨客意已深秋  
況對臨湖寺千松翠欲流

秋興

宋玉天南客秋來愁自深  
清霜數行鴈明月萬家砧

江雨

獨舸江門夜衝風湧岸波  
約量秋雨點不及旅愁多

漫興

一琴几上閑數竹窓外碧簾戶  
闌無人春風自吹入

秦川雜興

古陵在蒿下啼鳥在蒿上陵中人不聞行客自惆悵

顧璘

歸自灌陽望湘山口占

十日別湘山見如故人面何況石頭城是儂舊鄉縣  
遣懷絕句

月落猿聲苦風高虎氣腥山雷春送雪江霧夜藏星  
花豹金錢背文鵬蜀錦毛厨泉山窺細江稻水車高

猗女招歌劇蠻郎步射强花環垂耳大竹弩挂腰長  
澗冷菖蒲翠山春躑躅紅草驚秋盡火樹厭夜深風  
夜靜雲生室春深水到門松高多繡頂蘭古自懸根  
野鮮蒼兕猛山鮐鷓鴣香市笋擣苞出倉禾帶把藏  
不忌臬鷁暮何悲杜宇春蛩催三月織雞報二更晨

山行絕句

槎枒半折樹傾欹欲墮石行人如飛仙渺渺下青壁  
雨中溪行雜詩



十日溪中舟格格響溪石孤蓬過鳴雨忽失沙上脊  
日暮爭渡喧天陰野風急孤客來何遲蕭蕭荷鉏立  
陳沂

寄顧全州

曲渚湘雲暮叢篁楚雨秋愁心寄鴻雁煩爾過衡州  
春草

夜雨江南夢春風陌上情東皇如有意移向玉階生  
孫一元

江上

沙磔喧寒雨，楓根挽釣槎。  
菰蒲起烟火，隔水是漁家。

解衣

解衣坐漁梁，水風來許許。  
月明不見人，幽篁自相語。

秋夜

道人晏坐起推窓，時一唸白鶴。  
忽不見月明，秋滿林。

題孫道甫二景小畫

家近新塘曲，月明魚可掬。  
盡夜憺忘歸，和雲汀上宿。

巾杖散芳躅鉤輶啼遠林幽懷春冉冉日暮落花深  
毛應奎副使隱居嚴陵釣臺赴召小詩贈之  
長風吹去棹萬里客星孤何物為君贈桐江畫作圖

秋晚

秋晚不扃扉秋亭一葉飛採蓮人不見水面落紅衣

永夜

黃葉下西阪山空秋正清永夜無人語殘河盡夜明

避客

報客頻勞鶴束書更佳山從今松桂裏散髮弄潺湲

清風樓

長天帶川原野水映林薄倚闌吟眺餘江日當窻落

春日遊惠山以老杜一徑野花落孤邨春水生

衍韻次第得詩十首

春色滿三分梅事過其一不有載酒遊白日去更疾  
茅堂藏山隈尋轉更幽興一鳥浴寒塘數花明小徑  
石橋斜鬪水竹杖行堪把隔溪鶴如人相看不知野

境靜山光合門臨釣石斜老翁抱甕出清曉來灌花  
半里同井回數家帶籬落溪翁留白魚社友移新籜  
向晚意不歇殘陽澹欲無漁榔隔浦斷樵響入雲孤  
閒撫溪邊石坐彈竹下門殘霞不作雨遠水欲浮村  
短策時尋句高懷自領春山禽莫相避我是住山人  
卸杖坐松根覓句烟雲裏得意酬青山一掬野泉水  
歸來吟不了賸有水雲情船頭借漁笛韻中明月生

山中

來往不逢人家在山深處獨鶴忽飛來風動月中樹

即景

落篷回風力移舟維石次樹影散平波蟬聲入古寺  
亂山帶喬木斜日望中碧白雲忽傍人馬首嵐光滴

睡起

睡起散幽躅荒岡春日西野雲飛不起寒壓竹枝低

雜咏

夕陽沒中流舟子不停櫓風來未滿帆望斷桃花浦

盡日不見魚風高網罟冷蹋船歸未歸江波蕩人影  
鄭善夫

柴門

涼月光不了照我芳桂叢白晃如人長來往柴門東  
家住白湖陽習見風波事苔荻何蒼蒼亂我蘭與芷

王宗慶

舟次德州

遠浦漁舟小寒天柿葉稀歸心正愁絕一鴈夕陽飛

贈沈綬歸海虞

吳門城上山虎丘山下水春花曉鶯啼念子在言里

曉發清豐

寒鴉棲古枝蒼黃月未落山館何蕭然雞聲起城郭

夢中一首

欲上河陽郡先來洞府遊白雲滿天地紅葉不知秋

周金

題春溪圖



主人坐春溪更邀溪上客日暮不知還幽談待明月  
戴冠

途中寄王定遠

去去別淮浦行行到江鄉漸覺故人少空愁前路長

祝鑾

仙源

仙源何處來無乃自天上不然瀑布泉那得千萬丈

方豪

游桃花寺

聽說桃花寺游人興不禁桃花今不見流水尚堪尋

看月

看月月轉明幽人寂無語山空秋夜長松露濕如雨

胡纘宗

絕句三首

好鳥當窓聽奇峰隔戶看林開烟裊裊風動竹珊珊  
入懷宣化雨打面紫闕風舟子牽江黑漁人炊火紅

雨後寒烟白鷗鷁載滿舸橫江笑相議何處捉魚多  
舟行口號

歌枕坐舟中不知舟外雨掀篷烟滿江漁翁香前渚  
望安慶

青山下碧流江樹引舒州千里輕帆外層層見水樓  
月

萬里同安月秋來的的明願將通夜白流照水西營  
雪

匹馬出梅谿雪飛大如掌何處扣舷人杳杳春江上

元日楊參戎席上

滿地春花發當簾春水明坐聞楊柳外無數鷓鴣聲

題畫

秋晴天欲高卷釣歸來早家住碧池東雲白無人到

楊慎

積雨始晴

霽曉憑高處涼風吹我襟海天堪倚杵嶺樹小如簪

陪盛德章春泛

中洲歌采芳曲渚艤歸艎風起春江晚飛花點石梁

普吉菴

松箐一何深細路縈百折行人歇松陰羸馬餐松葉

風雨

羅甸愁山雨滇陽怯海風可憐風雨後長在客途中

思波池別劉潤之

酌酒臨池水回船拂芰荷匆匆上馬去留興與烟波

宿華亭寺

花樹高於屋紅霞夜照人  
聲聲枝上鳥也似惜餘春  
天風與海水鳴籟隔山聞  
半夜衣裳濕清朝樹樹雲

青橋夜宿

驛亭臨白水石榻滿蒼苔  
遠客渾無夢江聲枕上來  
夜行安慶

風順月仍明扁舟半夜行  
雞鳴問前路已近九江城  
青橋驛早發

遠客貪晨發三更夢已回江聲如驟雨吹到枕邊來

渝江登程

來往舟如屋相隨一月期登途不忍去翻似別家時

春二首

海風吹梅樹十日閉門中坐惜繁花過牆頭數落紅  
行樂三春好春來轉劇愁鄉心悲望遠莫上最高樓  
雨後見月

雨氣歛青靄月華揚彩曇戲魚蓮葉北驚鵲樹枝南

搥衣杵

山東女子趙小錢年十五為賊所掠罵賊不從以搥衣杵擊賊遇害事聞詔旌

其門

戕賊金鈞錡擊賊搥衣杵今見趙小錢昔聞楊慙女

出郊

高田如樓梯平田如棋局白鷺忽飛來點破秧針綠

妙湛寺

廢刹臨官渡香臺夜景澄僧言龍火燭却是打漁燈

費家



七月廿六日出城西相營外邏城和几山

溪上路傍路郭西關外關村村多綠樹處處是青山

劉棟

題雲門六寺扇景

霜林護碧波細雨濕寒蓑一曲耶溪棹雲深寺轉多

屠徑

夜聞笛

夢破寒猶重更長客更愁何人吹短笛今夜在南樓

齊之鸞

石松

瘦根盤鴻濛青枝傲霜雪上有白雲巢下有蒼蚪穴

白雲巖

烟霞起洞天藤蘿封石室娟娟峰上雲冉冉巖中出

趙漢

泊瓜洲

山寺清鐘曉江帆細雨秋瓜洲三日泊不為阻風留

湖上

鳥入山光去舟分樹影過秋江平似掌何處起風波

南大吉

閒居二首

落落新榆宅深深細柳村出門逢鳥雀歸院見雞豚  
碧窓紅藥砌青簡綠牙籤花落鶯啼樹風回燕入簾

林大輅

暮春直省

旅夢醒啼鳥晴窓日欲斜還將多病眼閒看續開花  
孫存

劉都幕泉亭

溫泉沸山巔汎泉迸山足一鷺飲東泉飛向西泉浴

李濂

良鄉道中

沙雁衝車起洲鶯隔岸聞暮看霞氣近疑是漢宮雲

薛蕙

花下

昨朝花始發今朝花已稀  
那為風吹落自是鳥驚飛

草堂

終朝草堂上獨凭烏皮几  
有時白雲來相見窓戶裏

滁陽孫氏山中五詠

錄二首

月橋

泊舟板橋口月出溪水綠  
何處采菱歸遙聞榜歌曲

雲洞

洞門雙玉扇隔岫窺雲霧裊裊三石梁苔滑不敢度

落花

今朝捲簾坐時見一花飛不惜芳菲盡春風稍稍稀

晚春

日長鶯語歇中酒眠高閣庭院寂無人春風掃紅萼

秋浦

秋浦多香草當年怨楚臣安知千載後尚有廣騷人

東臯

東皋落日明西候  
新甍冷徘徊盤石上  
愛此青松影

流觴渠

流觴泛激水  
手攬跳波濕  
恰怪波行遲  
風吹忽相及

城南梅開簡友人

郭外新梅樹  
春風吹欲殘  
未能携酒出  
幸為折花看

顧璫

壽州題壁

去郡今千里  
還家尚幾程  
春風楊柳色  
相送石頭城

張治道

白鷺

沙頭白鷺驚飛向青山閣日暮行人稀還向沙頭落

清明日

草沒尚書履花迷御史驄長安佳麗處偏在曲江東

許宗魯

春興

野霽花爭發川長柳漸齊春光更何許多在杜陵西



王謳

送姚方伯

野日流沙白山城落木黃秋來長送別何處折垂楊

汪應軫

登浮峰寺

攝衣入空山白雲留我住我欲卧白雲白雲又飛去

李鳴鶴

題畫美人

一夜春風發芳心不自持佳晨携女伴花下對彈碁

郭波

宿坪塘舖

獨樹郵亭影千山征路塵東鄉今夜月偏照未歸人

張治

秋夜與永寧諸宗丈話舊

圓月明高峰吟蛩在空壁尊酒話青州槐陰露欲滴

無碍山房

碧嶂孤雲宿青天一鶴飛夜龕燈影滅藤月照禪衣

九日子言家用辟間白坡韻二絕

錄一首

莫問崑崙山雲斷一千里莫對淵明花秋風中夜起

泊漢口走筆簡朱侍御

維舟漢江濱水色照黃鶴驄馬何不來風雨橫江落

李默

月下

鐘鼎非吾事神仙亦世稀停杯忽惆悵明月上人衣

張達

新年

磁甕三杯酒方牀一覺眠  
天涯萬里客如此過新年

任淳

野渡

潦深望不極問渡莫悽然  
漁笛蒹葭裏因風到客船

邵經邦

四十明朝是

四十明朝是頻聞畫鼓過殘燈持自照忽吐兩三花  
吳益夫

喜晴

朝日麗郊原晴風動梧竹沙鷗不避人飛來傍船浴

管浦

舟中雜興

江水白於練江花紅欲然長風一萬里吹送木蘭船

張綆

秋雨

秋雨中宵滴寒蛩四壁吟燈前搔短髮誰會此時心

湖上

欲理木蘭舟且樣垂楊樹沙觜兩鴛鴦飛入前湖去

文徵明

夜坐

殘月耿猶在流螢忽自飛一聲何處鶴露下欲霑衣

蔡羽

歸雲亭

尋幽坐翠微嵐氣坐人衣  
日暮高亭上雲歸僧未歸

徐霖

舟中雜詠二首

綠樹坐黃鸝青秧點白鷺  
睡起倚船窓知是江南路  
今夜河西宿無眠但數更  
並船何處客吹笛到天明

御選明詩卷九十七





總校官庶吉士臣侍朝

校對官編修臣莫瞻菴

謄錄監生臣張搓

欽定四庫全書薈要

集部

御選明詩卷九十八

詳校官原任主事<sub>臣</sub>李斯咏

欽定四庫全書薈要卷一萬八千五百九十八

集部

御選明詩卷九十八

五言絕句三

謝承舉

泊清溪

夜泊清溪岸臨流發嘯歌浪高風力緊江闊月明多

南浦

江流入南浦浦上有高亭日日送行客年年芳草青



題畫

悠然值林叟忘機坐日西灘聲與人語相逐下前溪

蕭山

岸帶青桑浦江環綠篠灣小航留不住日暮過蕭山

史諫議園亭雜詠

玉芝

角里舊餐餘化石頗奇古恥入丞相莊移來司諫圃

辛夷

紫粉蘸毫端似為不平發花神寂無言書空常咄咄

水仙

楚楚拂涼颼娟娟挹秋露誰招洛神魂來乞陳王賦

桐井

賓來轄可投吟餘茗可煮山翁詩夢醒石闌響秋雨

蒲石

仙人住蓬瀛涼雨洗瘦骨雨晴山月來清風生綠髮

蓮塘

望望水晶宮翠蓋迎仙姊中有蕩舟人誤觸鴛鴦起

萱

東風不解愁長信春光老宮娥已白頭尚折宜男草

題畫

燕雀隨風翻蛟龍逆潮上扁舟欲渡難橫江拍天浪  
天遙征雁踈海闊潛龍睡野埭客來稀孤亭倚寒吹  
月墮江欲吞風停波不動高眠天作幃慣與鷗同夢

送戈用周回滇五絕句

送君出南郭江城春正明  
重烟暗花柳何處滇南程  
江水從西來是君歸去路  
相思逐水波日夜向東注  
樹色迷浦沙蘋香靜湘水  
幽思懷騷人微音動哀徵  
遠望碧雞山金馬障其左  
鄉心不可羈夢裡芙蓉朶  
含悲弔屈平壯心懷馬援  
香芷生滄洲銅柱倚荒甸

金鑾

有懷

悵望隔江雲春來不見君  
歌聲與流水俱在夢中聞

銀河

月出影漸沒夜深光倍明  
鵲毛看又盡填到幾時平

程誥

琵琶亭

殘照臯亭夕秋風旅雁飛  
琵琶千載恨淚滿逐臣衣

詠史

易水長虹白將軍首入秦  
荆軻無劍術不是報讐人

雒下逢汪子明



我行西入秦驅車雒陽陌相逢故鄉親況是東歸客  
瓜州送鮑世重

沙上問歸帆日暮北風起遙看一片雲飛度江南水  
市汊驛下阻風

江干日色黃北風怒不已君看上水船一日三百里  
傳汝舟

月下

月明坐空山不覺石苔冷猿嘯搖藤蘿亂我松桂影

程佳

獨坐

空館寂無人  
撼撼鳴木葉  
乍疑風雨聲  
忽見當窓月

陳璽

斑鳩

香禽自何處  
共立枝頭語  
喚起曉耕人  
西疇足春雨

馬駢

曉行

明河欲西垂樹杪大星落隱隱遠烟消霜天一聲角

村獵

隴斷沙痕淺山空月色孤歸來夜將午射得紫髯狐

吳夔

山居即事

颯颯樹頭風山犬吠不已呼童啟柴扉明月照谿水

汪生民

避雨山寺

偶逐荷鋤入松關犬吠頻山僧買藥去風雨自留人

程節

賣花吟

妝罷幽閨坐門前叫賣花春光用錢買那得到貧家

鄭崑

青山

把酒對崔嵬青山顏亦開吾嗟不如女曾見古人來

木公恕

覽鏡

借覽青銅鏡香奩出繡襲  
喜看今日面不改舊時紅  
病起

臨曉新梳髮呼兒捲幔紗  
平生行樂慣病起即看花  
江村

江上層雲合村村結暮陰  
漁燈半明滅風雨葦花深  
張時徹

廬山

暗室生雲葉靈巖吐石膏何人吹玉笛縹緲落青濤

李舜臣

徐錦衣西園

暖日紅芳樹晴烟碧小溪春風二三月定有好禽啼

高叔嗣

延津縣立春

征路日纔幾客心時已煩春風花鳥處回首憶田園

至蘇門山

空山暑氣少臨水夏雲多  
照影人將老愁心在夕波

交城縣壁

汲黯匡君意顏延出守情  
憑高無處語寒日下孤城

陸粲

秋水亭

夷門秋水亭梁王古臺下  
臺前舊堤路盡日無車馬

田汝成

韶州

河成寒依浦村祇畫掩關隔山明野燒云是小溪蠻

趙時春

早起偶書

獨卧聽晨喧攬衣欲遽起院靜不聞人鳥啼深樹裏

嬰粟

嬰粟花如錦開時蝶滿枝明朝零落盡惆悵暮春時

馮恩

石湖對雨



綠水綠於染青山青欲流一飛洞庭雨萬樹盡生秋  
松烟結暝翠竹雨助秋寒空壑流雲滿鐘聲杳欲殘

題扇

山色和雲暝松陰間竹疎隔巖啼鳥處疑是子雲居

西宮月

長安生素月流采媚朝陽一照西宮去淒清若有霜

羅洪先

獨坐

數月不出戶庭前多夕陰閒看芳樹色一倍舊年深

山中雜詩

問我家何在山深多白雲巖前飛瀑下對語不相聞

唐順之

梅塢

層冰結平川積雪埋高樹無處寄幽情但到梅花塢

曾遠樓

層樓對迴溪溪邊草新綠不是傷春人聊騁千里目

迎仙館

空齋寂無人草木自森蔚不因羽客遊安得有雲氣

山池

百泉自奔注更不費疏鑿雨歇天氣清臨池看洗鶴

松關

月出照松關松陰正滿地恐有山僧歸終夜不須閉

筠徑

面面隔深竹茅齋在何處遙聞犬吠聲試從此路去

陳子文

夜泊皖城村舍

孤舟夜泊初遠寺疎鐘起茅屋兩三間懸燈深樹裏

王穀祥

水仙

瑤環月下鳴翠帶風中舉胡然洛浦神胡然漢濱女

蔡輟

暮春逢郭樂泉二首

結廬在中林因以消塵慮  
碁枰與酒竿幽人自來去  
訪友前溪上花落如紅雨  
習習清風來談玄坐芳樹

題胡止菴畫

大雪滿天涯山中只一家  
前溪有高士邀我看梅花

周顯宗

宿安平驛

湖靜冰初合人喧市晚收  
夜深誰共語寒月獨登樓

莊一俊

小居

雀飲硯池水蝶翻菜圃花雖非高士宅終是野人家

范欽

東歸次錢唐先寄弟

月落天將曙風高浪欲層夜來春草夢先已度西陵

蘇志皋

盱眙山館

山館雨初歇村園菜正肥摘花引寒蝶冉冉過籬飛

周復俊

憩白沙驛

且避黃牛險  
携車就白沙  
相逢芳草路  
任意看桃花

渡淮河

衰草深苔徑  
微瀾盡日流  
西風捲殘葉  
飛上木蘭舟

馮汝弼

夜發天津

明月天津岸  
孤帆水底明  
北來新鴈至  
彷彿自神京

王畿

登西天目

早起登山去芒屨結束牢但令雙足健不怕萬峰高

陳同甫舟中燕集次卓小仙韻

春風雙眼開落日孤帆去相對默無言悠悠渺雲樹

白悅

惜春次吳侍御亞夫

忽訝春光轉春山靜獨過鳥聲啼不歇無奈落花何



劉繪

賞花送客遊江南

宣笑攀花會悲歌悵別期  
明年賞花處只恐動春思

池上梨花

裊霧香魂暗淩波  
素質嬌可憐流雪影半逐杏烟消

陸師道

秋夜獨坐

寂寂復寥寥寒燈掛環堵  
犬吠何處村蟲喧今夜雨

殷邁

棲雲樓晏坐效寒山偈

春陰蔽幽齋朝來始和霽春風悠然來花雨滿庭際  
對雨千峰靜看山百慮輕昨宵明月夜露地白牛生  
何遷

萬松菴

青林千尺陰覆此山中閣月出不逢人門前松子落

李時行

旅思

寒月下疎桐清霜醉晚楓客心元自冷不是為秋風

趙錢

白龍潭

白龍水底眠猶放雲光入有時化作人獨向峯頭立

古藤洞

古藤生洞口不遣遊人入酌酒坐藤陰飛泉忽相及

題秋亭畫

亭臯木葉黃露滴瑤階濕坐待月華生捲簾放秋入

朱曰藩

廣心樓絕句為楊升菴賦

樓西鸚哥樹單棲鐵鸚哥兒童作蠻語花鳥入滇歌

雲南

名伯勞曰  
鐵鸚哥

舟行

淥水平如鏡芙蓉媚遠天時聞采菱曲唱近使君船

楊巍

春日南墅讌集

南郭春偏好留人到夕陽風吹山鳥語花落酒杯香

楊繼盛

苦冷

凍日摧寒色狂風送冷塵漫愁衣服薄眼底是陽春

彭輅

送祝學博之當塗

姑孰城頭月常邀采石雲山齋看不厭聊以贈夫君

周思兼

題畫

遠渚蒹葭滿孤村風雨多明朝江上路誰載酒船過

傅夏器

秋興

夏盡炎薰解火微涼露飛開窓通月色卷幌引螢歸

徐學謨

題陳道復畫折枝卷

碧桃花

艷不爭春麗香惟與露含小姬沾醉後寂寂倚清酣

茉莉花

露氣集芳叢千頭趁晚風淡妝宜小摘鬢禪玉玲瓏  
與諸文學酌沈廷望二絕句

索酒到西鄰冷然孤興發夜飲復厭厭林端露微月  
清鬟何處來遶座歌聲起摩挲諸少年燈前作秋喜  
為人題竹贈楊博士

水墨淋漓處清風漾輕碧相遺比琅玕掩映寒壇色

黃甲

夏日山齋

雨添春水漫溪上鰕魚肥月出僧因過船歸鵲正飛

李蒙

石室

連日深山雪春寒撲巖塢石室不關門風枝滴殘雨

題畫二首



春水流何遠春雲煖故饒柳邊雙燕子時觸最長條  
涓涓石瀨鳴兩兩江鴛語回溪無人來桃花照春渚

季科

曲水亭

飛瀑雲中響清觴石上浮蘭亭還我輩不減晉風流

姚汝循

半峰禪院遲同遊諸君

策杖款禪局垂藤交古路却顧後來人蒼蒼隔烟霧

沈奎

富春

雨後衆山青  
汀邊雙鳥白  
挂帆趁西風  
遙看富春驛

張祥鸞

村居雜興次潘百愚先生韻

屏居湖上村  
相攜塵外侶  
看竹過鄰家  
不問誰為主  
湖上看青山  
山影湖中倒  
湖光澹若空  
山色青未了

申時行

題畫

雪梅

瓊樹發寒葩紅英敷宿植堪憐冰雪姿況有陽春色

桂梅

金粟遠飄香霜枝寒吐萼相將領素秋不用悲搖落

穆文熙

俯谿臺

高臺勢翠律下瞰清流水平水跨石梁宛若飛虹起

林如楚

倦遊

野館花空發  
江城鳥亂啼  
倦遊春色裏  
斜日竹林西

陳文燭

送別

落日青絲騎  
西風白苧詞  
廣寧門外柳  
折盡向南枝

胡濤

梅

隴上春風生江梅幾枝發仙人坐吹簫飛墮一樓月  
許憫

西磳路

蒼蒼古木中夕陽忽已晚隔浦聞鷄鳴人家知不遠

皇甫湜

鍾吾驛晚思

遙山白雲外古驛青林端惆悵川鳥盡蒼然多暮寒

皇甫湜

題美人蕉

帶雨紅妝濕迎風翠袖翻欲知心不卷遲暮獨無言

梅花水仙

弄影俱宜水飄香不辨風霓裳承舞處長在月明中

題茉莉二首

萼密聊承葉藤輕易繞枝素華堪飾鬢爭趁晚妝時  
香慣臨風細花偏映日生若將人試擬小玉定齊名

馮惟健

姑孰道中三首

獨眠山館夜微鐘  
度溪口牽帷語僕夫  
起視天霽否  
煙起樹色暝  
水生江岼仄  
夜來別故人  
風雨最蕭瑟  
冥冥雨不絕  
噤噤啼征鴻  
寒江烟霧裡  
小艇一漁翁

高啓

山行

欲訪山中人  
未識山中路  
茅屋漏疎林  
蒼蒼但烟霧  
蘇黃

寫蘭寄王湘雲

幽蘭兩三花寫在齊紈扇寄語女校書秋來心莫變

張鳳翼

蟬

抱葉微沾露臨風響逗雲偶然鳴木末非欲使人聞

李攀龍

寄登宗秀才茂登池亭

窓中采蓮舟落日菱歌起坐見浣紗人紅顏照秋水



戲呈郭子坤二首

家有秦臺女青雲路不遙但愁明月夜天上喚吹簫  
丹竈幾時開妝成倚鏡臺不須嗔竊藥本是月中來

王世貞

衛河四首

河流曲曲轉十里還相喚那比下江船揚帆忽不見  
十五誰家女紅妝嬌自多低頭浣衣坐不解聽吳歌  
人家半侵河屋後曬漁網夜深喚小婦篝燈聽波響

人云風波惡風波信自惡生長在家鄉那得容華落

閨恨

興慶坊前柳蕭郎手自栽藏鴉今漸穩只是不歸來

江口

江口安檣處孤舟盡日停秋雲無限好只傍蔣山青

教坊婦

小拂乾紅袖新聲十四絃不知頭已白猶唱想夫憐

道過一嶺曰米花邨其名頗雅因成一絕

夾溪黃葉路三戶米花邨車馬須臾事寒山日掩門  
謝榛

東園春感

落花風不定終日亂芳塵昔醉故園酒寧知愁暮春  
春草青猶短牽愁爾許長天涯白首客獨立幾斜陽  
懷鄒子序

渺渺太湖水湖中多鯉魚故人時把釣應有北來書  
遊天壇山

偶逢雙玉童相引躡雲去犬吠洞門開山花最深處  
初春夜酌樗菴處士書齋

客子燈前酒梅花雪後天不須橫玉笛春意滿山川

春柳

嫩色含輕雨柔絲弄早春昏鴉棲欲定腸斷未歸人  
潞陽曉訪馮員外汝言二首

海日上孤帆山雲交雜樹美人方曉眠更在林深處  
野闊早霜明林空涼吹動一犬吠人來松窓破秋夢

春雪登樓

天垂樓外雲雪變城中樹何處不春寒鴉啼又飛去  
東園秋懷二首

地僻有長松鶴閒非短翮落落丈夫志白頭幾人識  
天寒聞落木葉葉是鄉愁敲窓作風雨不減去年秋  
秋閨

目極江天遠秋霜下白蘋可憐南去雁不為倚樓人  
梁有譽

東林寺前作二首

山色斜依寺江流曲抱村時有山僧出殘陽獨掩門  
寒日照流水晚風吹古樹遙聽暮鐘聲依依度江去  
秋夜雨中過黎氏山房

瑤琴不復理空餘山水情棄置石牀上風來時一鳴  
宗臣

寄陸子

白鷺三洲遠青山萬樹低相思惟夢到夜夜鳳臺西

郊行

並馬出春城  
搖鞭一相語  
楊柳遍西湖  
應從何處去

聞雁憶弟子培

秋雨千峰散  
寒雲萬里開  
不知天際雁  
幾日故園來

題畫

山徑度青波  
石門遲白日  
客到不披衣  
春風理瑤瑟

夜立

秋風天外聲  
明月江中影  
幽人把桂枝  
露下衣裳冷

徐中行

活水池

池分襄漢水岸夾武陵花但得高陽侶寧須問習家  
次劉明府宴二大參松雪菴韻二首

樹古苔痕厚山秋黛色增穿雲鐘報客坐石鳥窺僧  
雙星天目來九月雲林宿禪房秋興多題詩遍青竹

吳國倫

過七盤嶺



驅馬度層嶺馬鳴知輶軻欲舒千里足其奈七盤何  
落梅嘆

忽忽春無力梅花作雪飛誰能萬里外聞笛不思歸  
汪道昆

石林

落日石林西林中擁烟霧樵歌何處郎猶記來時路  
二弟園中合歡杏子

累累酣獨樹兩兩結同心好去投青帝春來薦上林

汪道貫

題扇

落日照前溪倒景映紅樹幽人不出山白雲自來去

煙梅

青靄春籠樹花枝巧耐寒神人在姑射只隔絳紗看

張九一

大隱園六景為曹大參賦

錄二首

苔階

高卧謝喧紛苔蘚青如積細雨啟柴扉空階散鳥跡  
柳堤

斜日將嫩柳黃金嬌欲滴堤上散髮人間來一吹笛  
池亭對雨示舍弟見甫

春歸草水青雲白山川曉微雨夜深來寒聲在空沼  
雪夜示見甫弟

流霞滿空庭幽篁時自語但見落花來不見花開處

盧枏

山雨五首

錄四首

日落石窓時林花起幽色不敢窺蛟龍雨昏潭影黑  
朝看山作雲暮看山作雨幽人期不來踟躕望江樹  
峽雨晝不絕暝烟沉孤嶂徘徊山中人苔蘚生衣上  
門前黃岡陂能長青琅玕夜來溪雨惡流作白石灘

李先芳

醉中偶成

小院草盈尺清砧月一鉤酒酣眠露下河漢向人流

客夜

空牀坐淒清佳人渺何許不省是他鄉依依夢中語

圓覺寺晚坐

片片歸林鳥微微出寺鐘僧門掩秋色明月在高松

閨情

月宇開天鏡高樓試晚妝秋風吹桂樹雙燕語雕梁

江雨

西山帶雨痕南浦生秋草烟中樹若薺波上舟如鳥

吳維嶽

晨詣玉華山摘桂花口占

凌晨採花遊蕭然遇山雨登閣啟雙扉新泉響何處

江上

淒淒江路風曖曖遠村樹愛殺鳴榔人長歌入烟霧

歐大任

朝漢臺懷古

甌駱猶歸粵河山尚隔秦誰令南海尉終作漢藩臣

黎民表

友芳橋

隔浦風烟暗桃花自不迷  
壺觴憐小阮時向竹林攜

魏允中

詠栢

孤立殊不移四時空翠積  
直愁枝漸高插破秋雲碧

詠竹

借問數根竹幾時能長成  
憑將截作管吹出鳳凰聲

客夜聞歌

如何清夜曲偏向旅人喧黃鳥春風外悠悠憶故園

夜行

一片泥滑滑縱橫荆棘樹月暗少人行前村不知路

胡應麟

胥口

落日溪水寒漾舟殊未已西冷何處村望望茶烟起

寄江離館



朝夢江離開夜夢江離落如何二十年不到江離閣

顧聞

夜泊崔鎮聞笛

雲落清河夜天橫片月涼江樓莫吹笛明日更山陽

鄧遷

感秋

白露下亭臯涼風吹綺陌一夕芙蓉花紅芳變瑤碧

馮行可

春雨

春雲欲作雨浮浮山帶生卧聽芭蕉上蕭蕭一夜聲

空濤閣

松靄鬱空青抱膝恣玄想一派濤聲來秋風起閣上

題倪元鎮小景

孤嶼媚清漣寒烟帶林薄庭空不見人一徑幽花落

許邦才

盈口夜泊

三日北風怒孤舟泊寒浦鄉夢苦難著瀟瀟滿江雨

陳所有

草堂

草堂在西林露頂避暑客來剥啄聲葛巾不知處

邵圭潔

桃葉渡

妾生如桃花根葉相綢繆隔江喚欲渡江濶使郎愁

黃尚質

采茶女

結束烏椎髻携筐去采茶歸逢鄰女笑也插杜鵑花

潘緯

上渡

渡頭風雨急橋斷夜來水時有喚舟人招招者誰子

松石臺

倚松踞盤石無伴坐亦好不信石無塵松風與灑埽

漂母祠

曾謂千金意能酬一飯恩  
往來人下拜猶是為王孫

吳承恩

秋夕

竹火煎茶寺菱歌載酒航  
人間秋夕好第一是錢唐

施漸

南山隈

一因搖落後悵望秋天空  
向晚尋歸徑村村夕照中

網集潭

朝向湖上去暮從湖上歸漁家自成市曬網及斜暉

竹房

寂寂春窓下惟餘修竹陰忽聞人共語送客出深林

陳鶴

寫山水

夜來風雨惡落葉打柴關曉起敞溪閣亂雲猶在山

呂時臣

再經鍾吾懷許兵馬

去日黃河邊水深不可渡故人久不回今作行人路

沈明臣

睡起

睡起當窓坐遠山侵竹斜竹西官路口一騎入林花

題長輿畫

近水晚逾碧遠山秋未黃夕陽寒滿地松影落衣裳

竹西村

蕭條苦竹西沿溪幾家住日暮起墟烟蒼蒼出高樹

梁王臺

日落梁王臺臺空映江水  
江水流不流只在鐘聲裡

江夜

起坐並汀花空江月自華  
一帆深夜渡分月過前沙

春盡日劉道士房

偶逢春盡日飲酒到斜陽  
再過丹房裡青山酒更香

中峰寺

樓閣翠微間鐘聲白雲裏  
尋僧秋日遲落葉行數里



浣紗石

不見浣紗人空留浣紗石石邊春草痕想見羅裙色

陳淳

畫梅

風引上春香雪弄南枝色為有惜花心樓中莫吹笛

岳岱

題畫

暮色起郊墟牛羊識歸路牧童無枕簟但鋪明月卧

方學箕

劉慎吾贈石

怪石從何得玲瓏自可憐感君同白璧置我小窓前

吳錦

送金伯謙北行

浮雲西北征客心渾不住到日屬秋深寒生灞陵樹

顧源

雜題三首

春水織文縠春花散雲錦壁上松蘿搖時見猿來飲  
晨登蒼崖巔夕息蒼崖足手把青松枝坐看春禽浴  
遶屋多叢樹蛩聲入曉窓此時心似水殘月照明缸

李敏

春曉

草閣臨春浦蓬扉驚曙鴉水明殘夜月雲傍隔溪花  
發盤塘

朝發盤塘坳夕望平陽郭江空雨冥冥無風客帆落

陸九州

半山

山深翠微寒飛花亂如雨輕風抽布帆落日在高樹

張文介

醉醒口號

夜分醉微醒山樓半銜月閨人猶未眠月底看蠶葉

趙綱

寄洛陽李五秀才

未得吳公薦空憐賈誼才年年三月裡相憶看花來

西郊

山關啟翠微霜鐘自晨夕花裡一僧來冷冷振金策

王叔承

鳴玉園雜景二首

魚扈

山童報新水沒到櫻桃樹雙飛跋扈魚衝散落去

硯洗

鸚鵡洗清泉細眼開春曉金魚吹墨花黑却浮萍草

答陳濟之雪中見寄

暮雪搖空江美人隔烟水門外寄書人蘆花裏雙鯉  
濟之怪余久歸賦雜言解嘲二首

白苧含閨怨吳蠶五月空但知桑葉落不識茜花紅  
梁鴻無好興歸及采桑時媿汝張京兆朝朝畫翠眉  
晚渡西湖

西湖宜晚渡趁得采蓮船越女嬌吳客寒衣再索錢

雨後雜興三首

秋雨欲浮村青螺上牀脚日出過東鄰船頭繫籬落  
野水平溪橋波翻蓼花亂斫竹編青籃門前開蟹簍  
溪娃逐晚涼雙雙戲簷底笑入豈花棚燒燈尋絡緯  
益卿簡寄家兄酒錢志感

異姓憐兄弟天涯寄酒錢急難那得汝我媿鵲鷁篇  
觀音巖訊蘇道人適山頭虎過

層巖飛茗烟道人正高坐牧童折山花笑指神虎過

黃姬水

四十八渡

武溪多野涉一日四十八入水人脛寒登崖馬蹄滑

王穉登

清口驛阻雨

小驛官無馬扁舟客有星淮南芳草色望見隔河青

冷泉亭

暮瀑浮花急春流飲鹿渾潺湲一片雨終日在山門



平望夜泊四首

魚鱗成石量桑葉論斤賣珍重絲網難家家月中曬  
雨多楊梅爛青筐滿山市兒女當夕飧嫣然口唇紫  
月下壓酒聲將船繫楊柳明日到家近不須沽一斗  
店旁栽紫薇顏色鬪江霞我家庭下樹歸日正開花  
霜寒

烈烈瓦溝霜他鄉草木黃合歡牀上被一半冷鴛鴦  
梁辰魚

紈扇

朝來兩蛺蝶分宿花房雨紈扇亦多情拂爾雙飛去

劉連


要屯舖西境

避水行西境豆中僻徑斜炊烟林內起深處有田家

開店雨中

牧童望遠近逐草白雲隈細雨牛羊外村邊蓑笠來

御選明詩卷九十八



總校官庶吉士臣侍朝

校對官編修臣莫瞻業

謄錄監生臣張搓